

ELIA LE NYEHELO EA PHOOFO

¶ Oh, na hoo ha se 'nene! "Morena, kea amohela." Ho amohela'ng? Tsepiso e 'ngoe le e 'ngoe eo A e entseng, ke ea ka.

² Joale, pele re lula fatše, ha re inamiseng lihlooho tsa rona motsotso feela ke tle ke se lebale ho rapella lisakatuku tsena mona.

³ Morena oa rona, bosiung bona re U leboha ka lifela tsa Sione, ka lebaka la Evangelia ea khale e hloekisang lipelo tsa rona bobeng, hape, ka, litsepiso tse tletseng mohau ka ho fetisisa ka Bibeleng ke tsa rona. Re li amohela ka tumelo. 'Me rea tseba hore Molimo ha o hlomphe motho. 'Me molokong oo Paulose a phetseng ho ona, batho... boholo ba ne ba kula. Ba mo tlisetsa lituku, le lituku, hore li mpe li ame 'mele oa hae, 'me ha ntoo nkuoa 'meleng oa hae ho isoa ho bakuli le ba mahlomoleng. 'Me Mangolo a re bolella meeaa e litšila e tsoile bathong 'me mahloko a ba tlohela ka baka la tumelo ea bona ho Morena Jesu. Molimo, Pauluse o se a faletse joale lilemo tse ka bang likete tse peli, ho kena pel'a Sefahleho sa Hau. Moloko oo o fetile le eena, empa U Molimo oa moloko o mong le o mong. Joale batho, bosiung bona, ba lumetse ho Uena 'me re inehela ho Uena, bosiung bona, lisakatuku tsena le liphutheloana tsa thepa, le ho lumela ka lipelo tsa rona tsohle hore U tla araba thapelo ea rona 'me ba tla fola. Aba sena, Morena. Re e romela ho bona tlotlisong ea Molimo, ka Lebitso la Jesu, Mora oa Hae. Amen.

⁴ Le ka lula fatše. 'Me ba nehetseng lintho tsena ba ka tla li lata hang ha tšebeletso e tsoile.

⁵ Ke thabile haholo bosiung bona. Ke tsoa mose ho thaba kajeno hang hoba ke phethela lipuisano tse ntlamang, le ho ea rapela. 'Me nako le nako ha ke kena tlasa letsatsi lena la lehoatata ke batla ho khutla hape ho feta. Empa ntho e le 'ngoe eo ke e thabelang bosiung bona, mohatsa ka... leha koana esale re le 'moho, 'me o bone lipono tse kholo tsa Molimo li bonahatsoa 'me li phethahala. O ne a theohetse nokeng tsatsing leo Jeffersonville mohla Lengeloi la Morena le hlahang khetlo la Lona la pele, e ne e hasitsoe hohle ho Associated Press naha bophara. E se e le... e le ka 1933. O ne a eme mono, a utloa Lentsoe a mpa a sa bone Leseli. Moo, esita boralitšoantšo ba likoranta ba bone Leseli. Feelaa a sa le mocha mohlang oo, a batla a le lilemo tse leshome le metso e 'meli, 'me o ne a eso bone Leseli. O ne a shebile batho, ba bangata ba ne ba akheha. 'Me la lula mono motsotso feela la ntano khutlela hantle feela la nyolohela marung hape. 'Me likoranta tsa hlahisa seratsoana se setle, "Leseli le mohlolo le hlahisa holim'a—holima moreri oa

selehae oa Mobaptise a ntse a kolobetsa." Ho ea kena koana Canada, sa kena khatisong ea Canada.

⁶ 'Me hape lilemong tse tharo kapa tse 'ne tse fetileng, khetlo la ho qetela ha ke le Phoenix, kea kholoa Moena Jack Moore a ne a le 'moho le 'na, a batla a . . . Mohatsa ka o batla a le boi haholo. 'Me eaba o 'miletša sefaleng, a sa lebella, 'me a batla a ilibana. 'Me a fihla kamora hoba ke fihle kalaneng, 'me tlolo ea tšebelesto ea pholiso e se e le teng. 'Me, a re, khetlo la pele a kena ka pel'a Sefahleho mono ka mokhoa oo. 'Me, bosiuung pele ho moo, a ile a 'Mona kalaneng, khetlo la pele a kile a 'Mona le ka mohla, mohla E ne e le le teng mona e eme kalaneng. 'Me ha ke kopana le eena kantle . . . meokho e ne e kolla mahlong a hae, 'me a re, "Billy, khetlo la pele bophelong ba ka, ke E bone." A re, "Ke . . . u ne u rapella mosali, 'me" ho re "Ke E bone e fihla hantle feela ka pel'a hae le ho ema mono metsotsoana e 'maloa feela, ho likoloha moo u neng u le teng. 'Me eaba, hang feela hoba u khaotse ho bua, Ea tloha." Ka hona ke thabetse hoo, hore E hlahile pel'a mahlo a hae. Le a bona, mofumahatsana eo o lokela ho feta linthong tse ngata, 'me ke thabetse hoo ke hona.

⁷ Joale, hosane bosiu ke tšebeleto ea pholiso. Le a tseba, esale re bolela vekeng ena hore litšebelesto tsa pholiso li tla ka Labohlano bosiu. Joale, tloong hosane thapama kapa—kapa hoseng mantsiboea, ha hora e ka ba ea botšeleta, hore le se ke la sitisa tšebelesto e setseng. 'Me Billy, Leo, Gene le bao, ba tla fihla mona ka littlankana tsa thapelo, ho le abela setlankana sa thapelo. Ke ka nako ha re tlisa batho kalaneng le ho ba rapella. Joale re . . . ke a . . . Ke lokela ho jara likopano tsa Amerika kamoo batho ba rutiloeng, ka ho beoa matsoho. Joale, hoo—hoo ke Lengolo, empa oo ke moetlo oa Bajuda. Seo ha se a etsetsoa Balichaba, empa Balichaba ba se kakatletse. Molichaba e ne e le, "Ha ke a lokela hore U ka kena tlasa marulelo a ka, bua Lentsoe feela 'me mohlanka oa ka o tla phela." Ke hantle. Empa Mojuda, "Tloo U behe morali oa ka matsoho 'me o tla phela." Le a bona, oo e ne e le moetlo oa bona, e ne e sa etsetsoa Balichaba.

⁸ Bosiu ka mor'a bosiu, le hora ka mor'a hora, motšequare le bosiu, Moea o Halalelang o a fihla, ho senola, ho pholletsal le moaho, ho bolela liphiri tsa lipelo. Le e bona ka linako tsohle. Ke ho le tsebisa hore Boteng ba Morena bo teng mona. Joale, haeba le ka E amohela feela, le tla fola hona hoo. Hobane pholiso eohle e kileng ea etsetsoa uena, e se e felile, esale e le joalo lilemong tse sekete le makholo a robong. Poloko eohle eo le tla e fuoa le ka mohla, e se e lefiloe, ke ea hau ho e amohela. Ho se ho fetile lilemo tse sekete le makholo a robong, kapa ho feta, ho tloha e fetotsoe poloko ea hau. Empa joale ha le ka ntemotha likopanong, ke re, "Na e tla etsa hore u lumele?" Bonang, mehlolo le meeka ha li a etsetsoa pholiso leha e le poloko, empa ke ho thusa batho ho elelloa le ho utloisia hore Boteng ba Molimo bo teng mona. Ebe moo Eena . . . haeba Eena . . . Kamoo ho ka bang kateng, ke

mohlolo o fetisang ka boholo. Hona joale re mpa re qala feela re bona mehlolo.

⁹ Joale ha ho fihloa mothong, ba 'maloa ba bona ba ile ba tsoha literechareng le litulong tsa bakuli le linthong, le ho tsoela kantle. Hantle-ntle seo ha se mohlolo. Che. Le a bona, esita le Mahlale a Bokreste a ts'oere ntho eo. E ka ba e—e—e maemo a kelello moo u ka bang . . . ho fetola mokhoa oa monahano oa hau. Joale, ha re lumele hobane e ne e le eona, hobane ke lumela e ne e le tumelo. Empa leha ho le joalo . . .

¹⁰ Ke ne ke le koana La Salle, Lorraine, Fora. Ke ne ke le Paris. 'Me ka theohela ka mono ba robalitse mosali ea shoeleng, a epetsoe. 'Me ba hohla lejoe moo, 'me batho ba kena ka mono le lihlotsa, melangoana, 'me ba ba robatsa fatše ba tloha ba ikela, ka ho hohla lejoe leo holima mosali eo ea shoeleng. Le a bona, o shoele, 'me a ke ke a buella letho ho feta . . . 'Muelli o mong feela lipakeng tsa Molimo le motho, 'me ke Kreste Jesu. Ke tsoa lelapeng la Makatolike, ke—ke a ba tseba ba lumela ho—ho bathong ba shoang, mono ke hore meeaa ea bona e a ba buella; ba fapaneng, ba bang bakeng sa lipolotiki, ba bang bakeng sa lintho tse ling. Ho 'na, ke bonohe. Ha ke thonkhe maikutlo a lona, kea tsepaa, empa ke tlameha ho tsepahala. Le a bona, sohle se botsang bafu ke bonohe.

Ba ile ba mpotsa seo Meksiko, le ho re, "Ho ka thoe'ng ka Jesu?"

¹¹ Ka re, "Ha A shoa. O tsohile hape, O phela kamehla." Le a bona? Ha A shoa, O a phela. Bohle ba fetetse mose oane, etsoe, Lengolo le bolela ho re "Ba leng koo ba ke ke ba tla mona, le bana ba leng mona ba ke ke ba ea mono." Ha ho motho ea kileng a tšela kapa ea tla khona le ka mohla. Ka baka leo e a e batalatsa haeba e . . . Jesu o boletse joalo.

¹² Empa re fumana lintho tsena li sebetsa. Kahoo joale 'me bosiu bo bong le bo bong Moea o Halalelang o leka ho le tlisettsa Boteng ba Boleng ba Oona mona, ha se boteng ba motho. Motho a ka ikokobetsa feela, ka neo a ka ikokobeletsa selika sa mofuta sa Moea se ka u bulelang Molimo. Empa e ke ke ea sebetsa pele u e lumela le ho e amohela, 'me e ntano sebetsa. Le a bona, ha le ka lula mono 'me e mong le e mong oa lona—e mong le e mong oa lona a sa lumele, le sa lumele Lentsoe la Eona, e ke ke ea sebetsa le ka mohla.

¹³ Jesu, mohla A ne a etela ba Habo, naheng ea Habo, mesebetsi e mengata e meholo O sitiloe ho e etsa ka lebakala ho se lumele ha bona. 'Me haeba A sitiloe ho e etsa mohlang oo, A ke ke a e etsa joale, ka lebakala ho se lumele. Le a bona, ke tumelo ea hau.

¹⁴ Ka hona e qosa 'na le uena, 'moho le Moea o Halalelang, ho etsa hore lintho tsena li etsahale; ho nthabisa, ho le thabisa, hore Molimo o bolokang Lentsoe la Oona o teng mona.

¹⁵ Empa Moea o Halalelang ha o kena kopanong, ho phethahatsa ho fihla botsekeng seo Lengolo le boletseng A tla se phethisa matsatsing a ho qetela, le ho tsoela kantle holima letšoel joaloka ha A kile a etsa mohla A neng a le mona, le ho senola eona merero ea lipelo, le menahano le mehopolo ea pelo le ea kelello, motho a ka belaela joang? Le a bona, oo ke mohlolo o phethehileng, mohlolo ho feta seritsa se tsamaeang, hobane taba eo e ke ke ea etsoa matla a moea a le sieo. E lokela ho etsoa ke matla a moea. Ka hona, ebe moo u bonang hantle feela seo Bibebe e se tsepisitseng le seo ba se lume-... seo re se lumelang. Ke mohlolo o fetang ho hoeletsa. Le a bona, ke mohlolo o fetang ho bua ka liteme. Pauluse o boletse joalo. Esita le lineo tsa makhonthe tsa Moea o Halalelang tsa ho bua ka liteme, ke mohlolo ho feta hoo. Re mohlolong oa ho qetela. E lepiloe joalo ke Bibebe.

¹⁶ Ka hona, bosius bona, ha u a tlameha ho emela hosasane bosiu ho feta moleng ho beoa matsoho. Joale, ho beoa matsoho ho ke ke ha thusa letho ho feta temoho ea mehopolo ea pelo; ha e hakaalo, ho 'na. Joale u ka e amohela feela, ho e tiisetsa, ke ea hau. 'Me u e lumela ka pelo ea hau eohle.

¹⁷ Empa hosane bosiu, haeba u... Lengolo le hlile le re, "E-eang ka lefatše lohle, le boelle babopua bohle evangeli; mehlolo e tla tsamaea le ba lumelang ke eona ena." Mehlolo eohle; 'me hape, qetellong, A re, "Ha ba bea bakuli matsoho, ba tla fola." Ke 'nete. "Bao ba..." Eona... E tla teela balumeli hare. Ho lokile. Joale, re-re balumeli, ka hona, ka mokhoa oo, re tla beha bakuli matsoho bosiu kamorao ho bosiu, 'me Molimo o entse mehlolo e meholo ka bona. Re fumane mehlolo e meholo ka ho rapella lisakatuku. Re fumane mehlolo e meholo ka ho lemoha mehopolo ea pelo. Le a bona, ntho eo eohle 'moho, li sebetsa tlotlisong ea Molimo. Ha e a etsesetsoa motho, ha e a etsesetsoa kereke, e etselitsoe khanya ea Molimo. Khanya ea Molimo!

¹⁸ Joale, pele re phetla Lentsoe la bosiu bona... Oh, re ka phetla maqephe ka mokhoa *ona*, empa Molimo o loketse ho Le phetla; hobane Lengolo ha le a itlela ka ho itlhulosetsa ha motho, empa Moea o Halalelang o ngotseng Lengolo ke Mohlalosi oa lona. Ka hona ha re inamiseng lihlooho tsa rona joale re sa rapela. 'Me ba bakae ba ratang ho hopoloa thapelong, na le ka e tsebisa ka ho phahamisa matsoho a lona, leha e ka ba eng? Oho Molimo, sheba. Bohle re a hloka, na ha re joalo? Ke a hloka, le 'na, metsoalle. Ke phahamisitse matsoho a ka.

¹⁹ Ntate ea Maholimong, ka boikokobetso le ka khutso le ka hlompho re kena ka pel'a Sefahleho sa Hau se seholo se khethethileng, ka ho tseba, pele ntho e le 'ngoe eo e etsahala, U teng mona hobane U tsepisitse joalo. U boletse, pele U tloha, "Moo ba babeli kapa ba bararo ba bokaneng ka Lebitso la Ka, Ke tla ba teng har'a bona. 'Me ekare ha ba lumellana ka taba, ka taba efe, ba kopa, ba tla e neoa." Morena, ho tlisa tsepiso ea Hau

tabeng ena, theko ea Mali a Hau, ke kopa hore monna e mong le e mong, mosali, kapa ngoana, ba ileng ba phahamisa matsoho a bona bosius bona, U tseba pelo tsa bona, ba ke ba amohele seo ba se kopang. Aba sena, Morena.

²⁰ Re batho ba hlokang. Re tsamaea lefatšeng le lefifi, le sera se seholo sa Hau, hoo, re ne re ka sitoa ho betana le eena holane e se ka Moea oa Hau o Halalelang. Ka baka leo re a tšepa, ho lumela, le ho sebetsa ka tumelo, hore O tla re etellapele le ho hlekta tselia. Litlokotsi li ngata tseleng, tse chehetsoeng maoto a rona a tetemang, empa re leka ho latela mehlala e Mali ea Eo ea hlolang lefu, lihele, le lebitla.

²¹ Re tataisetse, bosius bona, ka Moea oa Hau o Halalelang, Morena, Mantsoeng a loketseng ho boleloa, le ho tobisa Mantsoe pelong eo e A hlokang. Hape, Morena, pheletsong ea kopano, 'me ha re tloha re ea malapeng a rona a fapaneng, re ke re khone ho bua hape, joaloka bao ba tsoileng Emmause, "Na lipelo tsa rona li ne li sa chese kahare ho rona ha A ntse a buisana le rona tseleng?" Hoba re e kopa ka Lebitso la Jesu, le bakeng sa Hae. Amen.

²² Ho lōna ba bolokang Mangolo, phetlang le 'na hona joale bukeng ea Marena a Pele. Ke lakatsa ho bala karoloana temaneng ea 17...khaolo ea 17, ke rialo, 'me ke tla qala temaneng ea 14. Ho bala temana ea 14, 15 le 16 ea khaolo ea 17 ea Marena a Pele:

Hobane MORENA Molimo oa Israele o re, Phofo e ka pitseng ha e ka ke ea fela, le ole e ka sehong ha e ka ke ea fela, ho fihlela letsatsi... MORENA a tla nesa pula lefatšeng.

A ea a etsa ka polelo ea Elia: 'me eena, le moshanyana, le ba ntlu ea hae, ba ja matsatsi a mangata.

Phofo e ka pitseng ha e a ka ea fela, le ole e ka pitseng ha e a ka ea fela, ho ea ka lentsoe la MORENA, leo a le buileng ka Elia.

²³ Bosiu bo tlamehile bo be bo ne bo batla bo esa ha a phaphama. A phethola hlooho ea hae e khathetseng mosamong ha a utloa sellonyana, se hlomolang mose ho phaposi. 'Me a sa khona ho robala bosiu bohole, o ne a hlobaetse ka lebaka la tlokotsi ena e kholo. Moshanyana a se a phaphame hape, a sa ka a robala le metsotsotso e fetang e mashome a mabeli kapa a mararo, 'me ke utloa lentsoenyana la hae le re, "Mama, na u ke ke ua tsoa 'me ua sheba ka sehong ho bona haeba ho sa setse sengoathoana se le sang sa bohobe? Ke lapile haholo! Ha ke khone feela ho robala."

²⁴ 'Me eitseha a sheba sefahlehonyana sa hae ka... maramanyana a hae a phathahane, le mahloana a hae a sehlefala, moriri oa hae o molelele o leketlile o hloka ho kutoa, hempe ea hae ea bosiu e le matamuke; liphororo tsa meokho li theoha

mahlong a hae e phalla sefahlehoaneng sa hae, ka nako ha a mo phathatsa lerameng le ho re, “Moratua, leka ho robala, ’me u utloisise.”

²⁵ Ho se ho fetile lilemo tse tharo pula e sa ne lefatšeng. A khumama fatše, ke a ’mona ha a ntse a hoeletsa ho Molimo, a re, “Oho Morena Molimo, Jehova, ke Uena Molimo oa bo-ntat’ a rōna, Ea fepileng bana ba Hau le ho ba hlokomela ho theosa le lilemo. ’Me ke lekile ho phela ka ’nete le ka ho loka ho Uena, ’me joale mona ke bona moshanyana oa ka a llela lijo, ’me ho se letho ho mo fepa. E se e le liveke joale re ja hang matsatsing a mang le a mang a mararo kapa a mane, ’me joale tsohle li felile haese phofshoana e tlalang seatla le khabana e tlalang oli. ’Me ke ntse ke leka ho e baballa hofihlela letsatsi le chaba, re se tšohe re eshoa bosiu. Ke entseng, oho Molimo? ’Na, lekhabunyane la hau, ke phetse kannete. Ke lahlehetsoe ke monna ntoeng, ntoa ea Morena, ’me ke bile mohlolohali lilemo tse ’maloa joale, ’me ke lekile ho phela bokhabane le ho boloka Melao ea Hau. ’Me haeba e le nako ea ka ea ho ikela, ha ke tsotelle; empa moshanyana oa ka, pelo ea ka e robeha likotoana ho mo utloa a llela lijo, ke sa khone ho mo fa letho.”

²⁶ Hoba a qete ho rapela, a ema. A sa tsoa khutlela ho ea robala metsotsoana e seng mekae. ’Me o ne a phahamisitse matsoho a hae, ’me seaparo sa hae sa bosiu se matamuke se se se batla se le maharaso. O ea sefensetereng ’me o sheba kantle, ’me ho se ho tla ela. Oh, ho ne ho chesa haholo!

²⁷ Lebatama la meeaa ea kahlolo le ne le foka holima sechaba se neng se lebetse Molimo. E ne e le mehleng ea puso ea Akabe, khosi e khopo le e sehloho ka ho fetisisa ea Iseraele. ’Me o ne a nyetse moetsalibe, Jezebele, eena e ne e le morapeli oa liseto. ’Me lenyalo le futsoetsoeng joalo ha le ke le atleha le ka mohla, ho ke ke ha khoneha feela, mosali a ka amohela mokhoa oa monna kapa monna o tla nka mokhoa oa mosali. ’Me e ne e le mosajana e motle haholo, ’me Akabe, e batla e le molumeli ea fofo feela, a se a inehetse mehopolo ea hae le ho re, “Oh, be, ho ’na borapeli ha se letho, ’na ke khosi.” ’Me e se e le khale ba helelitse lialetare tsa Molimo ba haha lialetare tsa Baalime, kapa Baale, ke rialo. ’Me mohoo o ne o phahame hakana khahlano le borapeli ba ’nete ebile bareri ba se ba kene tlasa khatello e kholo ba inehetse.

²⁸ Nakoana e fetileng ke entse tlhahiso ka bareri, kapa ka ntho e ’ngoe letsatsing lena, ’me sehlopha sa kopana le ’na sa re, “Moena Branham, liphutheho tsa rona li re hotolla feela!” E bakoa ke hoo, phutheho e tsoa e ngala haeba moreri a sa ba khahlise.

²⁹ ’Me bareri ba hlotse tlasa khahlamelo ea khosi halelele hakana hoba sebe se ne se lumelloa, ho se meeli. Ke papiso e khabane haholo ea kajeno hobane, sechaba se ne se khothalelitse lintho tsena, batho ba ne ba batlile ho tuma. Ba nahana, “Haeba sechaba se rialo, ho ne ho itoketse.” Le kajeno ba rialo, “Haeba

sechaba se re ho lokile ho rekisa joala, etlaba ho lokile ho bo noa. Ha sechaba se lumella basali ba rona ho apara liaparo tse sa tlalang seterateng, 'me molao o sa ba hlahlele, khele, ho itoketse ho e etsa.' Hoo ho ka tsoa ho itoketse sechabeng, empa libukeng tse kholo tsa Molimo le jere boikarabelo 'me le tla lokela ho ikarabela pel'a Molimo. Empa ba ne ba oele, ba tlameha ho nyebella tlas'a moroalo.

³⁰ 'Me sechaba se ne se atleha, 'me ba hopotse katileho e le pontšo ea hobane Molimo o na le bona. Ha se 'nete ka botlalo. Molimo o tla ho uena . . .

³¹ Maele a khale, maele a hlomphollang Molimo, a reng "Molimo o thusa ba ithusang." Ke hlomphollo ho Molimo! Molimo o thusa ba sitoang ho ithusa. Ke Molimo oa ba hlokang mohau. 'Me ke Molimo o mohau. 'Me maele ao a a reng "O thusa ba ithusang," ha u khona ho ithusa, ha u hloke thuso ea Hae. Empa O thusa ba sa khoneng ho ithusa.

³² Empa sechaba se ne se nahanne, ha feela ba ntse ba ejahamonate 'me ba apere hantle, ntho e 'ngoe le e 'ngoe e tla loka.

³³ Empa o teng e neng e le oa mehla ea sekhale, o ne a lumela hoba Molimo oa mehla ea sekhale o ne a le teng, a lumela hoba Molimo o bolokang Lentsoe la Oona o ne o le teng, ho lumela hobane Molimo oa Abrahama, Isaaka le Jakobo, o ne o halalela 'me o hloka boinehelo bo feletseng khalalelong ea Oona. Empa a hlouoe ke Jesebele le moifo oa hae oa sejoalejoale. E ne e le moreri oa bona, empa ba sa e lumele. Kahoo, a tlameha ho ipata ho baballa bophelo ba hae.

³⁴ 'Me Molimo o ne o mo rometse holim'a thaba, le ho re . . . ho mo fa molaetsa, le ho re, "Theoha, u boelle khosi eo ea khale e khopo, 'HO RIALO MORENA.' Pula e ke ke ea na, kapa esita le ho lala phoka, pele u e bitsa." Ho e beha molomong oa Elisha ho bitsa pula ka nako ea teng; empa o ne a tšoere linotlololo tsa leholimo, a ka khona ho le thiba kapa ho le bula. 'Me A re, "Ke batla hore u nyolohes ho tsoela lefeelleng . . . la sena . . . ho kena lefeelleng, ke rialo, ho tsoa tšenyehong ena. Tsoa har'a bona. U ba reretse 'me ha ba u utloa, 'me ha ba phetse ho senyeha ho feta. Nyoloha u kene lefeelleng, u lule pel'a molatsoana, Kerithe, 'me Ke tla . . . se ho laeletsoe makhoaba ho u hlokomela." Oh, batho ha ba hana, Molimo o bolokile makhoaba a ka e phethisang!

³⁵ Johanne o itse, "Molimo o ka tsosetsa Abrahama bana ka majoe ana."

³⁶ Jesu o itse, "Ekareha ba ka khutsa, mafika a tla hooa hang."

³⁷ Molimo O ka etsa seo o se batlang. Oa re, "Ke se ke laetse makhoaba, 'me a tla u fepa." 'Me a mo tlisetsa nama le bohobe.

³⁸ E mong o kile a re, "Ebe a e fumane kae, Moena Branham?"

³⁹ Ka re, "Ha ke tsebe. Ke tseba ho le hong feela, a e tlisitse. A e nkile hona moo Jesu a e nkileng mohla A neng a nka lihlapi tse

hlano le . . . kapa libaskeiti tse hlano le lihlapi tse peli, le ho fepa likete tse hlano. E tsoa hona letsohong le tšoanang la Molimo o Matlaohle la pōpo.” A mo tlisetsa hlapi le bohobe, makhoaba, ho lula a bo neha Elisha, ’me a bo ja, le ho inama a noa selibeng. Molimo o ne o phomotsa moporofeta oa Oona.

⁴⁰ Oh, ke thabile hoba Molimo o betlile tsela ea ho phonyoha! ’Me ba mo hakanya a hlanya, “Moporofeta eo oa khale, mofelisa-monyaka oa khale,” kamehla a leka ho felisa monyaka meketjaneng ea bona ea nyakallo, ho ba bolella hoba e ne e le sebe. ’Me Molimo . . . ho sala taelo ea Molimo morao, ho nyolohela lithabeng le ho lula liphahameng, nqalo e ommeng ka ho fetisisa naheng. Empa Molimo oa ’na oa phallisa molatsoana. ’Me ba le tlase mono ba ntse ba inyaea maleme ba batla metsi.

⁴¹ Le a tseba, Molimo o na le mokhoa oa ho arabela thapelo. Mosajana o ne a phetse ka botšepehi. A sa ka a nyaloa hape, a itšalla a sa nyaloa ho ea kopana le monna oa hae khanyeng. E ne e le mosali ea hlomphehang. ’Me e se e le liveke seho se ntse se fokotseha, se qepha, ’me a ntse a sa phetse ho rapela, ’me tšepo e bonahala e sa hlahe kae kapa kae.

⁴² Le a tseba, mono re ka fumana thuto. Hore, haeba u rapets e ’me u phethile litlhoko tsohle tseo Molimo a u batlang tsona, ’me le joale O khutsitse, ha A bue letho, ’me koana u phethile litlhoko, joale, ho etsahalang lekhatheng leo? Haeba u tseba hore u phethile litlhoko tsa Hae ’me u entse sohle seo u tsebang ho se etsa, joale tumelo ha e thekesele, e itulela ka khutso ’me e nahane hantle. Tumelo e itšoarella kamehla Lefikeng la Mengoaha, ’me ha e sisinyehe.

⁴³ Thaka leo la senatla le bitsoang “tumelo”! Ke buile khafetsa, “Tumelo e sefuba se mohoete.” Ha e bua, tsohle li a khutsa. Ha tumelo e re, “Khutsa!” tsohle li a ema, hoba ke mampoli.

⁴⁴ ’Me o ne a fihletse litlhokahalo tsohle. O ne a phetse bohloeki, ho phela bokhabane, ho phela ka hlompho, ’me a phethile litlhoko tsohle tsa Molimo. Empa, ekare O ne a khutsitse. Ka linako tse ling Molimo o e etsa ho u fetisa tekong, ho bona karabelo ea hau. Le se ke la e lebala!

⁴⁵ Haeba u feta kalaneng, u rapelloa, ho beoa matsoho, ’me eka ha ho etsahale letho, seo ha se emise tumelo le hanyenyane, u phethile litlhoko tsa Molimo. Joale, haeba u li phethile! Joale, haeba u honyela ho Molimo, u a tseba hore pelo ea hau e a u ahlola. . . . ’Me re a tseba, “Ekare ha lipelo tsa rona li sa re ahlole, joale re fumane.” Joale, empa ekareha lipelo tsa rona li re ahlola, le ho parola kalana ha ho hlokahale, le ho kopa Molimo ha ho hlokahale, hobane ha u na tumelo ea ho e amohela. Empa haeba u phethile tlhoko eohle eo Molimo o e hlokang, ke moo tumelo e qatsohang e tsoa, le ho re, “Molimo ke Molimo! Ke phethile litlhoko.”

⁴⁶ Lengolo le re, “Ba itšepelang Morena ba tla nchafatsa matla a bona, ba tla nyoloha ka mapheo joaloka ntsu, ba a matha ‘me ha ba khathale, ba tsamaea ‘me ha ba tepelle.” Joalokaha sefela se bolela, “Nthute, Morena! Oh, nthute, Morena, ho ema.” Hlatsoa moea oa ka Maling a Kalvari, ho phethisa tlhoko ka ’ngoe, ho chesa marogo ‘ohle ka mathoko, le ho re, “Joale, Morena, ke tla ke ithlophere matsoho, ke mpa ke itšoarella ka Sefapano sa Hau. U e tšepisitse, Morena.” Ke maemo a mofuta oo, lebaka leo batho ba nkhopolang ke le motho ea itšeħlang thajana. Empa ka phaposing, kapa motšeо ho lehoatata, u tlameha ho kena maemong ao pele u kena sefaleng sena mona. Hobane, Satane ha a phetse ho nehela linthoana ho leka ho sitisa ho hong. ‘Me u tlameha ho itšoarella Sefapanong, u sa itšepe bokhoni ba hau, mehopolo ea hau ka sebele, ho itšetleha ka Letsoho le sa feleng. U sa ipolele bohlale, u sa itlalehe kelello ea hau, u mpa u bula ‘me u lumella Moea o Halalelang ho bua. Molimo o batla Kereke ea Oona ka hare. Ho kena maemong ao.

⁴⁷ Molimo o a u leka. Mora e mong le e mong ea tlang ho Molimo o lokela ho lekoa pele, ho lauoa, ho bona haeba a ka mamella taeo. Haeba re nyoloha re re, “Ke lumela Jesu Kreste ke Mora oa Molimo, hore O shoetse libe tsa ka le ho tsoha hape ka letsatsi la boraro. O hlabetsoe litlolo tsa ka, a tetekoa ka baka la makhopo a ka. Kotlo e re tlisetsang khots e Mo oetse holimo, ‘me ke folisoa ka maqeba a Hae.” Ha u rialo, ka boipolelo... libe tsohle tsa hau le makhopo a hau, ‘me bokhoni ba hau le sohle tseo u nang le tsona, li robatsoe aletareng. Joale, mono, ha u a nka letho letsohong la hau, Satane o tlil’o thunya motsu o mong le o mong oo a ka u khonang. Empa ha u ka kheloha oa re, “Be, mohlomong ha ke a pholosoa, mohlomong ha ke a fola,” u ntano furalla Hono, Bibele e le bitsa “bana ba bonyatsi, e seng bana ba Molimo.”

⁴⁸ Molimo o leka mora e mong le e mong oa Abrahama joaloka ha A entse Abrahama, hoba re peo ea Abrahama. Ha re shoeloh Kreste, re peo ea Abrahama le majalefa ka pallo. Peō ea Abrahama, Abrahama o ne a ruile moea oo. O ne a fuoe tšepiso. ‘Me efela ha ntata rona a ne a tšepile Molimo ‘me a nkile tšepiso, ea ntho e sitang, le ho tiisetsa lilemo tse mashome a mabeli a metso e mehlano pele e ka bonahatsoa le ka mohla, a ipha matla ka nako tsohle, peo ea hae e joaloka ntate. Ho sa tsottelehe se etsahalang, ha re rapelloa, e batalalitsoe! Ha re hlekha ntho eohle tseleng, re phethile litlhoko tsohle, re tlosa tsohle tseleng, le ho kopa Molimo, le ho ema mono le ho tseba hore u tla e amohela.

⁴⁹ Molimo o ile oa leka Jobo joalo. Enereha Jobo a kopa mohau, o ne a hlahisetsa bana ba hae sehlabelo, moporofeta eo o ne a tšoere ntho e le ’ngoe feela eona e ne e le nyehelo ea secheso. Empa e ne e le phetho seo Molimo o se batlileng.

⁵⁰ Molimo ha o hloke thuto le khahla-khahla ea bosaaona, O hloka pelo e inehetseng thatong ea Oona. Ha A u kope ho apara ka tsela ea mofuta, kapa–kapa ho ea linthong tse itseng kapa

likholesheng tse itseng, kapa digarata. O kopa moea o ithobileng, o robekileng, o ikokobelitseng, le pelo e ratang ho Mo amohela.

⁵¹ O ile oa leka Jobo, le ho bona karabelo eo A neng a tla e fumana ho eena. Empa eitseha A nka linku tsa hae a nka pholo ea hae, ho nka likamele tsa hae, ho nka bana ba hae, “Ke tla bona seo Jobo a se buang joale.”

⁵² ‘Me a re, “Morena o nehile ’me Morena o latile, ho bokoe Lebitso la Morena.”

⁵³ O fumane seo O neng o se boleletse Satane O ne o se fumane ka ho Jobo, “Ha ho ea joaloka eena, lefatšeng.”

⁵⁴ Eaba lialuma li qala li puruma, mahalima a qala a halima. Moea oa theohela holima moporofeta, ’me a hoeletsa, “Ke a tseba Molopelli oa ka o a phela, ’me matsatsing a ho qetela O tla ema holima lefatše. Leha liboko tsa letlalo li senya ’mele ona, empa ke tla bona Molimo nameng ea ka; Eo ke tla ’mona ka bona, mahlo a ka a tla boona, e seng e mong.”

⁵⁵ O ile a leka bana ba Baheberu ho bona karabelo ea bona. Ba ne ba boletse hara bahetene ho itsoe “Molimo o phelang o ne o le teng, Jehova Molimo o ne a le teng, le hoba E ne e le Molimo oa Leholimo le Molimo oa lefatše, ’me O ne o kakatletse moea o mong le o mong letsohong la Oona.” Kahoo Molimo oa ba fetisa tekong. ’Me ba ne ba phethile litlhoko tssole, ba ne ba rapetse ka botlalo ’me ba hlekile sohle tseleng. ’Me ba hanne ho inamela seseto sa khosi. ’Me a besa sebopi hasupa ho feta mehleng. ’Me ha ho pelaelo Satane a ntse a leka ho ba bolella, “Ena ke qetello ea tsela.” Ke rata kamoo ba buileng, “Molimo oa rona o bokhoni ho re lopolla seboping seo sa mollo, empa, leha ho le joalo, leha A sa etse hoo, re ke ke ra tlola Melao ea Molimo. Re tla lula re tsepahetse! Tumelo ea rona e ke e tiletse lilemong tse tlang ho tla, ho re, re kile ra tsepahala pallong ea Molimo.”

⁵⁶ “Molimo oa ka o khona ho mpholisa ho *sena*.” Kapa, “Molimo oa ka o khona ho ntoela setulong sena sa bakuli. Molimo oa ka o khona ho etsa *sena*. Empa ke Mo amohetse joaloka Mofolisi oa ka. Ke ipoletse libe tsa ka (ho se lumele ha ka) le ho ipolela hore ke Mo lumela e le Mofolisi oa ka. Se tlang, le se eang. Leha ke sa fole kajeno, ke tla khona hosane; ha ke sa khona hosane, ke tla khona isao. Morena o neile ’me Morena o nkile, ho bokoe Lebitso la Morena!”

⁵⁷ Oh, ke eo moo e neng e le teng! ’Me eitseha ba kena seboping sa mollo, tlas’ a teko, tlas’ a hlahlolo, ba tiisetsha ho isa qetellong. Empa Molimo oa fihla nakoaneng le motsotsso, ’me Oa ba lopolla. Ba tsebile hoba ba ne ba rapetse ka botlalo, libe tsa bona li ne li boletsoe. Ba itsebile ba phethile tlhoko eohle, ’me koana O bonahetse a khutsitse. O mpa a khutsitse ho u fetisa tekong, ho bona seo u leng sona, se kahare ho uena, ho bona haeba u tilie ho tsoa pelong ea hau seo u se buang ka melomo ea hau. E ke

e thophothele. Re ka bua ka melomo ea rōna, empa na pelo tsa rōna li a e bolela?

⁵⁸ Joale, eitse hoba mosajana enoa a tsebe hoba o phethile litlhoko tsena tsohle, 'me le joale Molimo o ikhutselitse. Ea ka ha O mo tsotelle, O sa tsotelle haeba a phela kapa a shoa. Empa, nako eohle, Molimo o ntse o sebetsa. O ne a sa tsebe, empa Molimo oa bolella Elia. Oa pshesa molatsoana, oa otlolla letsoho la Oona 'me oa emisa molatsoana ho phalla. 'Me Elia a re, "Morena, hobareng o eme o sa phalle?"

⁵⁹ O re, "Ke laetse mosali oa mohlolahali ho u fepa." O se o mo laetse, athe ha a e tseba.

⁶⁰ A ka tsoa a laetse bopaki ba pholiso ea hau; athe ha u e tsebe, empa lula u lebeletse feela. Haeba u khotsoe hoba u phethisitse litlhoko tsohle, haeba u itseba u phethile tsohle tseo u tsebang ho li etsa, 'me o ipeile pel'a Molimo, ho ka etsoa ho le hong feela, hona, ho itšarella tšepisong ea Oona. Ho lula mono! Molimo o tšepisitse ho araba, O tla e etsa. Ha u tsebe seo O se laetseng, lengeloi lefe, kapa ho etsa *eng*. Ekaba bosius bona, pele tšebeletso ea pholiso e qala hosane bosiu. Ekaba Molimo o bone boemo ba hau kajeno, ekaba O utloile thapelo ea hau.

⁶¹ Ke ile ka utloela litholo le limumu tsena bohloko haholo. Ke batla ho ba bea matsoho le ho ba rapella, ka qala ka khaotsa maobane bosiu, empa ke itse hoo ho ke ke ha ba lokela bohle. Empa ke tseba joang hoba kae-kae Molimo o khutsitseng o tsebang pelo o teng, batho bana ba phethile tlhoko ea bona ea Molimo, 'me ba itokisitse, 'me lengeloi le teng mona bosius bona ho ba loela mahlomoleng 'ohle a bona? Ke tseba joang? Ekaba Molimo o laotse toelo ea bona bosius bona. Ebang ke rapella bakuli, kapa che, ba tla e fumana hobane Molimo o e batlile. Kholiseha ka Molimo, u ntano itšarella, ho phethisa litlhoko tsa Hae. Molimo o tseba ho etsa lintho tse lokileng, ho tseba ho li etsa ka tsela ka lokileng.

⁶² Joale, ho a makatsa ha Molimo o ka romela moporofeta oa Oona tlung ea mohlolahali. Sebaka se se kakang! Empa e tšoanetse e be e ne e le mosali ea khabane ruri, ho seng joalo O ka be o sa romela moporofeta oa Oona mono. Oh, efela ha motho a ena le tokelo, eka khona e be motho ea tšoaneleheng ho amohela monna ea kang Elia.

⁶³ Le sa hopola, e ne e le Zakaria, ka tlung ea hae, ha thoe o ne a tšepahetse a le khabane, a emetse Molimo ho ba nea ngoana, 'me Lengeloi, Gabriele, a fihla tlung. E ne e le moroetsana Maria ea neng a phetse bohloeki le hloeko, 'me a emetse pallo ea Molimo, eo O rometseng Lengeloi ho eena.

⁶⁴ Le bua ka ho mathaka le lefatše le ho bonya le lefatše, le ntano lebella ho bona mangeli le ho etsa mehlolo, athe e kathoko ho lenaneo la Molimo. U tlameha ho phela hantle. Hloekisa ntu, hloekisa mekhoa ea hau, hloekisa lintho tsa

lefatše, tlosang likarete tsa lona le setsoalle sa lona sa lefatše, itokise, 'me ke moo Lengelo la Molimo le ka buang la re, "Se tšabe, ke 'Na." Ebe moo lintho li etsahalang. Empa eena . . .

⁶⁵ Mosajana o ne a theohile a ntse a rapela, a sa tsebe hore thabeng moporofeta o theoha a ntse a tsamaea. O ne a bone pono, hore a ee kae. Molimo ha o tsamaise batho ba Oona ka ho tlatselela, O ba bolella moo ba eang teng. O ne a shebile kahara motse. Oh, ho ne ho tšabeha. Batho ba ne ba bolaoa ke tlala, 'me ba fehelooa metsi, le batho ba lapile. Ke khalimiso ea boitšoaro bo hlephileng. Ke khalimiso ea sebe.

⁶⁶ 'Me sechaba sena se emetsoe ke koluoa. O ke ke oa khona . . . Litekanyetso, esita le molao oa tlhaho o ke ke oa e lumella, athe re a—athe re senya chelete ka ho phela bohlasoa, 'me halofo ea lefatše e bolaoa ke tlala (bohle ke batho bao Kreste a ba shoetseng).

⁶⁷ Ka lona lebaka leo ntho e lutseng pelong ea ka ke masimo a boromuo. Bareri ba lona mona Phoenix ba khabane, le hohle United States le libakeng, likereke koung ka 'ngoe, banna ba baholo ba Molimo, litšebeletso tsa pholiso, banna ba baholo ba kang Oral Roberts le banna ba bang ba baholo, ba ntse ba rera. 'Me batho ba teng koana, ba shoa ka likete letsatsi ka leng, ba eso utloele ka Lebitso la Jesu. Bafumanehinyana, ba litšila, manekro a lapileng, tlase koana Afrika le koana India, mathakanyana a robetseng seterateng, a eshoa, a sa tsebe le ho re "Molimo" ho bolelang. Athre ngangisana ka liphapang tse sa tsebisahaleng tsa bolumeli ba rona. Oh, ehlile ha se hantle (ha ke nahane, metsoalle), haeba ho lutse pelong ea hau ho bona seo.

⁶⁸ Joale, hlokombela mosajana enoa oa mofumanehi, hoba a hloelise ka sefensetere 'me a bone letsatsi le se le ea chaba, le hanyenyane a sa sa tsebe se mo emetseng. A hopotse e le lefu la hae le moshanyana oa hae. Kahoo ke . . . Eare a sa robetse, ha re mo shebeng metsotsoana feela. O a tloha, hoba a rapele, 'me a pheula moririnyana oa hae mahlong a hae, le ho re, "Moratuoa mothoana oa ka, o tšoana haholo le ntatao ea ratehang, oa mohalaleli. Kamoo a kileng a tšepa Molimo! A bileng a tella Iseraele bophelo ba hae, kantle lebaleng la ntoa! 'Me u tšoana le eena haholo. 'Me, Moratuoa, ha ke tsebe hobaneng ba se nang molato ba sotleha le ba molato, empa ba etsa joalo."

⁶⁹ Sechaba sena, Bakreste, ba tla utloa boholoko ka lebaka la bokhopo ba lipolotiki, ho tla hlokofatsoa sechaba sohle.

⁷⁰ Joale 'mona a kena ho re, "Ke tla luba senkhoanyana joale. Ke tšoere ho lekanang senkhoa se le seng feela sa—sa bohobe, 'me re tla se ja, re ntoo shoa." A kena ke hona phaposing, ho ntša phoofo sehong sa phoofo. Ke 'mona ha a phumula lerojana ka letsohoana leo, le masapo, ho phophotha khetsana ea eona; ho e hlochlora, lerojana ka leng, 'me qetellong a fumana ho lekanang

senkhoa se le seng; ho ea koana lefisoaneng a le phahamisa ho minya olenyana ea lona, e ka tlalang khaba.

⁷¹ Joale, phoofo, lintho tseo tsohle li bolela ho hong. Phoofo e ne e lekanya "Kreste." Kreste e ne e le nyehelo ea phoofo. Enereha ba sila phoofo e le nyehelo e tsokotsoang, bakeng sa Kreste, eona e ne e le Kreste nyehelong e tsokotsoang, ka Testamenteng ea Khale, ba ne ba e thumisa ka leloala leikhethang, bohashana ka bong ba phoofo bo tlameha ho siloa ka ho tšoana, hobane Jesu Kreste esale eena maobane, kajeno, le kamehla.

⁷² Le sa hopola mohla likolo tse ling holimo mono li neng li sa tsebe ho khetha maraka le lierekisi, 'me ba akhela maraka a hlaha moapehong oa lierekisi, ho pheha, 'me ba hooa, "Lefu le ka pitseng."

⁷³ Elia a nka phoofo e tlalang seatla, a e faha pitseng, le ho re, "Jang!" Phoofo e ile ea etsa'ng? Phoofo, ka pitseng, ea e fetola ho tloha lefung ho ea bophelong; ho tloha mohloring o ntšang lefu ho ea mohloring o phelisang.

⁷⁴ Ho a tšoana le bosiung bona, ha lefu le ahile ka lefisong la hau. Kreste, o fahoa lefisong la hau, ho u tlosa lefung ho kena Bophelong. Kreste o etsa phapang. Ho kena pelong ea motho, oh, O hlahisa khotso e fetang kutloisiso. 'Me hape E hlahisa Bophelo Bosafeleng, "Ea lumelang ho Mora o na le Bophelo Bosafeleng, 'me a ke ke a timela le ka mohla."

⁷⁵ Joale, a lata phoofo, e neng e lekanya Kreste. 'Me Kreste ke Lentsoe. "Lentsoe le ne le le tšimolohong, Lentsoe le ne le le ho Molimo, 'me Lentsoe e ne e le Molimo. 'Me Lentsoe le ne le etsoe nama 'me la aha hara rona." Kreste, nyehelo ea Phoofo! Eaba o lata oli. 'Me oli e lekanya "Moea." Eaba o tsoaka Lentsoe le Moea 'moho, 'me a qala a E kopanya.

⁷⁶ Oh, ntho e loketse ho etsahala ha seo se etsahala! Etlere bosiung bona ha ke bolela Lentsoe le ke le oele pelong ea hau. U ntano lumella Moea o Halalelang ho kena ka mono le ho qala u tsoaka Hono. Hlokomela se etsahalang ha u tsoaka Lentsoe le Moea 'moho! Jesu o itse ho mosali selibeng, "Mosali, Ke a u bolella, nako e a tla, le joale e se e tlide, mohla Molimo o hlokang ho rapeloa ka Moea le ka 'Nete." 'Me Eena ke 'Nete.

⁷⁷ Phoofo, shebang seo a se entseng, o tsoakile Lentsoe le Moea 'moho. Batho ba bangata ba ruile Moea kantle ho Lentsoe, ba bang ba ruile Lentsoe kantle ho Moea. Empa ha u nka, u li teanya 'moho bobeli malulong a tsona, senkhoa se se se tla hlaha! Ntho e a etsahala.

⁷⁸ Mohlolohalinyana oa mofumanehi o ne a sa tsebe seo a se etsang, empa Molimo oa re ho Elia, "Ke se ke mo laetse."

⁷⁹ 'Me Elia o tseleng holima majoe, a theoha ho bona pono ea hae e phethahala nqa e 'ngoe. 'Me ke enoa o eme mono, a iphumula likeleli ka mou oa matsoho a hae a khale o mahoashe,

le ho re, "Oho Jehova Molimo, tumelo ea ka ha e-so hholehe, 'me e ke ke ea hholeha. Ka mokhoa o itseng, ha ke tsebe kamoo sena sohle se leng kateng, empa re a rutoa hore lintho tsohle li sebetsa hammoho molemong." O ne a tsoaka phofshoa ena, a lokisa senkhoanyana a e phaphatha. A re, "Joale ke nako ea ho tsoa ho ea roalla patsi." A khutla a bula lemati, le ho re, "Oho Morena, mpanyana eo e lephako e robetse mono, 'me ke getetse ho ja liveke tse peli kapa tse tharo. Ke mo file sengoathoana sa ka."

⁸⁰ Eo ke 'mè, lerato la 'mè ho lesea la hae. Ha ho letho ho le bapisa, haese lerato la Molimo feela. "Leha 'mè a ka lebala lesea la hae le anyang, haele 'Na nke ke ka u lebala le ka mohla. Mabitso a lona a betliloe liatleng tsa matsoho a Ka." Ebe A ka u lebala joang? "Nke ke ka u furalla, kapa nke ke ka u tlohela. Ke tla ba le uena ka mehla, ho isa bofelong ba lefatše."

⁸¹ A tloha a sheba lesea la hae, mohlomong a khutla a le aka phatlanyana. Leha a ka akheha le ho shoela kantle. O a tsoa. Ho qala ho . . . letsatsi le qala le chaba holima maralla a Judea. 'Me o sheba letsatsi ha le qala le nyarela. Tlasana ho seterata o utloa mahlapa le ho lintho tse tsoelang pele. 'Me a tsoela kantle jareteng 'me, hlokromelang, a roalla lithupa tse peli (e seng sephaka se tletseng), lithupa tse peli. Ke eng? Ke "Sefapano."

⁸² Joale, mang le mang o a tseba, metsoalle ea ka ea Maindia mona e a tseba, kapa setsomi sefe feela, mokhoa o nepahetseng ho besa mollo o tšoarellang, ke, ho tšekalatsa lithupa tse peli, likoqo tse peli, ho li hotetsa hantle bohareng, le ho 'na u rotetsa lintlha tsa tsona. O tla qeta bosiu bohole. Nkile ka robala khafetsa lefeelleng, ka lithupa tse peli tsa boholo bo sa feteng *moo*, 'me ke futhumale bosiu bohole. Ho lekanang feela ho iphuthumatsa, ho o baballa o tuka hantle bohareng ba 'ona.

⁸³ Joale o tla etsang? Ho hotetsa lithupa tsena tse peli. 'Me Lentsoe le Moea li hlahisitse ho ipeha sehlabelo sefapanong, ho itokisetsa ho sebetsa, ho itokisetsa bophelo. Ho bea Lentsoe le Moea, eo ke tumelo ea hae Lentsoeng la Molimo ka Moea o Halalelang, ho ikisa sehlabelong nqa ntho efe le efe Sefapanong. 'Me eitseha a khoaela thutsoana tlasa sephaka sa hae, tse peli, le ho boela a khutla, a khutlela morao, 'me lentsoe la tsoa khorong, "Mofumahatsana."

⁸⁴ Pejana ho *moo*, leqheku la monna, le batla le le lefatla, matšoala a hae a boputsoa a leketile hohle, le moriri oa hae o lepeletse, a le molangoana letsohong, letlalo la khale la nku kapa a khahliloe ka nthoana, a theoha ka seterata, ho re, "Morena, ke teratana ea mofuta e tšoeu. Ho tla hlaha mosetsana e motle a batla a le *mocha*" (ekaba o ne a le *mocha*, moshanyana a le *mocha*) "kantle ka jareteng. U itse eo ke mohlolohali ea neng a tla mphepa. Joale, o hokae? Ke tla 'ne ke tsamaee." Moea o mo tataisetsha nqa *ena*, le ho mo thintša. Oh, ho babatseha hakakang ha bara ba Molimo ba tsamaisoa ke Moea oa Molimo. Ho sa

tsotellehe kamoo e utloahalang e le bosaoana hakae, ba etelloa pele! O a tloha . . . O theoha ka seterata se seng a ntoo nyoloha ka se seng, ho theosa ka seterata se seng le ho nyoloha ka se seng.

Kamora nakoana, Moea oa re, “Sheba letsohong la hau le letona.”

⁸⁵ ’Me o qamaka *joalo*, kamoo A etsang mona kalaneng, bosiu ka mora bosiu. Oh, Molimo o sa ntse o tšoana! “Sheba letsohong la hau le letona, ho le letšehali, motho ea rapelang ea e hlokang ke eo.”

⁸⁶ ’Me a sheba letsohong le letona la hae. “Hela, teratanyana e tšoeu ke eo. Ke hantle feela. Nke ke ka tloha mona, hobane sefate sa khale ke seo se eme mono. ’Me ntho eohle ke eo kamoo ke e boneng ponong.” Lemati le a buleha ’me ho tsoa mosalinyana ea mosesane.

⁸⁷ Joale, hopolang, o tlil’o roalla lithutsoana tse peli feela. A ke ke a roalla tse tharo, tse peli ho bopa Sefapano. A thonaka lithupa tse peli a li bea sephakeng sa hae ’me a khutlela morao, ho nahana, “Ke tla be ke apehile senkhoana sa nchanyana ha a tsoha. ’Me ke tla mo fa sona, ’na ke ka ja letho. ’Me ke tla sikara moshanyana oa ka matsohong a ka, ’me teng re tla lula re ntoo shoa.” ’Me a qala a kena tlung.

⁸⁸ A utloa lentsoe le makatsang mose ho khoro, la re, “Mosali, na u ka ntlela metsana ka nkho?”

⁸⁹ ’Me a reteleha, ’me a nahana, “Khorong mane ho eme leqheku le batla le le mosa.” A mo shebisisa, ’me mohlomong a phumula meokho mahlong a hae, e ne e le hoseng haholo. Le a tseba, Molimo o etsa lintho tse makatsang. O ne a ikemiselitse ho etsa sehlabelo. Metsi e ne e le leqeme, pula e sa na lilemo tse tharo le likhoeli tse tšeletseng.

⁹⁰ “Ana u ka ntlisetsa . . .” Molimo o ka tsoa tsoa o mo laetse ho rialo, ho bona seo a tla se etsa, ho hlahloba karabelo ea hae. “Na u ka ntlisetsa metsana ka lefiso?”

⁹¹ ’Me a mo sheba. “O utloahala a fapane. Ntho e teng ka leqheku leo la monna ke le utloela bohloko.”

⁹² Molumeli ofe ho Molimo o tla arolelana le e mong lethoana. E. Ntho e le ’ngoe ka batho ba Pentekosta, ba nehela hempe e mokokotlong oa bona, Morerong oo. Ke hantle. Ke ’nete. Ke ntho e kholo, e ’ngoe ea lintho tse kholo ka bona. Ke baabi ba fetisisang lefatšeng, hoba ba tseba lithepa tsena tsa lefatše ke lefeela. Ba tsetela matlotlo a bona holimo Leholidong, hoba ba nyolohela teng le leng la matsatsi ana.

⁹³ ’Me kahoo mosali enoa, a re, “Ke tla arola metsi a ka feela. Re tlil’o shoa, ka baka leo ke tla nyehela metsi a ka, le ho a nyehela khabane e mosa ea leqheku le emeng mono, hoba ekare o nyoriloe ’me o khathetse.” A re, “Ke tla a lata.” ’Me a qala a tloha.

⁹⁴ A boela a utloa lentsoe, le reng, ““Me letsohong le leng la hau, na u ka ntlela thathana ea bohobe?” Oh, khili! Joale, joale ke’ng?

⁹⁵ Tšepo ea hae ea ho qetela ea bophelo ba ngoana oa hae. Tšepo ea bona ea ho qetela, ’me bohobe bo tla be bo felile, oli e felile, ntho eohle e tla be e felile joale. Empa a hetla, ’me a ipotsa. A re, “Ke saletsoe ke bohashana ba phofshoana ka faking. Ke tšoere oli e lekaneng feela ho e kolobisa, ’me ke se ke bo lokisitse, kapa, ke e tsoakile. (Ke tsoakile Lentsoe le Moea li kopantsoe ka mono. Ke tšoere Sefapano ho se bea holima sona, ho se fetola senkhoa sa Bophelo.)” ‘Me ke ha Moea le Lentsoe li kopana, holim’ a Sefapano, seo se u etsetsa senkhoa sa Bophelo. Ke hantle. “‘Me ke e kopantsse ’moho, ’me joale ke kena kahare ho e apeha, le ho tšolela moshanyana oa ka ea shoang ka mono, esale a llela lijo bosiu, ke—ke tlameha ho mo fa sona. Ke tla nyehela sa ka ’me ke—ke tla mo fa sona. ‘Me ke nt oo mo sikara liphakeng tsa ka, ’me bobeli re tla emela lefu.”

⁹⁶ A re, “Empa, etsetsa ’na lethoana, pele.” Na ha se mohlololo ho monna ho qela mohlolohali, ea shoang, lijo tsa hae tsa ho qetela ka tlung, ka ngoana ea shoang? Molimo o etsa lintho tse makatsang! Ho re, “Etsetsa ’na lethoana, pele!”

⁹⁷ O ile a hlahllobisia, “Le a tseba, Bibele e re re amohetse baeti. Re ile ra amohela baeti, e ne e le mangeloi, re sa tsebe seo re neng re se etsa.” “Be,” a re, “Ke tla e etsa.”

⁹⁸ ‘Me ha a reteleha, a re, “Hoba . . .” Oh, khili. E ne e le eo, matšeliso a matonana ho molumedi ofe a kileng a utloa, “Hoba, HO RIALO MORENA!” Ke lona Lentsoe leo a neng a le emetse leo. “HO RIALO MORENA, ‘Faki ea e ke ke ea fela, le lefiso le ke ke la omella, ho be ho fihle letsatsi leo Molimo o tla nesa pula lefatšeng.’”

⁹⁹ Re fumana’ng mono? Le batle ’Muso oa Molimo pele, le ho loka ha Oona, lintho tse ling tsohle li tla ekeletsoa. “Ke tseba joang, Moena Branham? Ke tseba joang?” Ke tseba ho le hong feela, beha Molimo pele u ntano tsoelapele. Sehlabelo! Tsoaka oli, tsoaka e—e Lentsoe le Moea ’moho, rapalla Sefapanong ka sebele sa hau, le ho re, “Ke ’na enoa, Morena.” Beha Molimo pele linthong tsohle!

¹⁰⁰ “Hobane, HO RIALO MORENA, ‘Lefiso le ke ke la omella, le faki e ke ke ea fela, ho be ho fihle mohla Morena Molimo a tla nesa pula lefatšeng.’” A tseba, ke hona, hoba eo ea buang le eena e ne e le moporofeta oa Molimo. Oh, pelo ea hae e tšoanetse ebe e ile ea kaba-kaba hakakang! A mathela kahare, a apeha senkhoa, a mo tlisetsa sona, ka metsi, matsoho a thothomelang holim’ a marama ao a khale a bothetseng, a tseba hobane Molimo o ne o tlide ho mo pholosa, ka sengoathoana sa bohobe.

¹⁰¹ Oh, ha u ka nka tšepisonyana eo ea Molimo, le ho lokisa lintho tsohle, ’me u suthise tseleng, shebang se etsahalang! Fumana pelo eo . . . suthisetsa ho se lumele hole le eona. Tšoara

tumeloana eo ea hau, 'me u e behe Sefapanong, le ho re, "Ke phetho seo ke se tšoereng, Morena. E nke"; sheba mothinya, "HO RIALO MORENA." Oh, kajeno O tšoana le mehleng ea Hae le ka mehla. Ke sona seo a neng a se emetse.

¹⁰² Ho ka tsoa ho fifetse haholo joale, empa, le a tseba, ka nako tse ling re a rutoa ('me ke rerile ka eona bosiu bo bong) kamehla ho fifetse ho feta pele letsatsi le chaba. Hora e lefifi ka ho fetisisa ea bosiu ke ha naleli ea hoseng e chaba, e halimisa letsatsi le tlang.

¹⁰³ Jeremane ba hlomme setšoantšo, ba se bitsa "Leru" setšoantšo. Se—se hlolisana le setšoantšohali sena sa thakhiso mane ho... koana Forest Lawn Los Angeles (setšoantšohali se bophara ba moaho ona, ba ne ba tlamehe ho haha mohaho o teelang setšoantšo hare; bongata le se bone). Empa sena se Jeremane se bitsoa, "lengeloi..." kapa, "Letsatsi La Leru," Ke a kholoa se bitsoa joalo. 'Me ha u chechella morao ho sona sebakana o se sheba, oh, se a nyarosa, ekare maru a befileng a tsoakaneng 'moho, joalo, ka nako ha maseli a se khantša. 'Me eka maru a ntseng a biloha, kamoo setšoantšo se teiloeng ho halimisa maseli, se lekisa leru, sefefo se befileng se khorohang ho qhaqha hohle. U ntano laeloa ke lesupatsela, "Ak'o atamele, 'me u se behe leihlo feela." 'Me ha u se atamela haufi, ha se maru, ke mapheo a otlanang 'moho a mangeloai, a nyakaletseng. Ke lehlohonolo le ikhakantseng.

¹⁰⁴ Ekaba maloetse a hau bosiusng bona, mohlomong sehlabeledo sa hau ho tsoela mona, e ne e le leseho le ikhakantseng feela. Mangeloi a Molimo a teng mona, a teng, ho teanya mapheo a 'ona 'moho le ho nyakkala, hoba ho ngoliloe joalo Lengolong, ho re, "Mangeloi a Leholimo a thaba ha moetsalibe a le mong a baka." Nahana hoo. Hoba, HO RIALO MORENA, Jesu Kreste esale eena maobane, kajeno, le kamehla. Mohau oa Oona o ke ke oa fela. 'Me O ikemiselitse ho le neha sohle seo lipelo tsa lona li se lakatsang.

¹⁰⁵ Joale ha re rapeleng nakoana, re sa inamisitse lihloho tsa rona thapeleng. 'Me ke tšepa le tla lula le le boitšoarong ba thapelo. Na motho o teng mona joale (re koetse mahlo le inamisitse lihlooho leroleng leo le ntšitsoeng ho lona; 'me, ha Jesu a ka lieha, le tla fetohela leroleng) 'me ha u sa bolokeha, na u ka phahamisa letsoho la *hau* hakaalo, le ho re, "Moena Branham, bophelo ba ka ebile sesomo, le 'na, 'me ha ke a bolokeha. Nkhopole lithapeleng tsa hau bosiusng bona, Moena, ke tla phahamisa letsoho la ka"? Na motho eo o teng ka mona, moshanyana, ngoanana, monna kapa mosali, ea sa bolokehang? Ha ke sa tla le kopa ho fetisang, haese ho phahamisa letsoho la hau joale ke tle ke u rapelle.

¹⁰⁶ Ka letshong la ka le letona, Molimo a u hlohonolofatse, Molimo a u hlohonolofatse, Molimo a u hlohonolofatse, le uena, le uena. Nqa e 'ngoe, morao ka motšeо, nqa e 'ngoe mona moleng

o hare oa litulo, phahamisa letsoho la hau feela. Ha ho motho ea shebileng, e mpe ebe 'na feela le Moea o Halalelang ba shebileng. Joale, Molimo a u hlohonolofatse, Molimo a u hlohonolofatse. Ke botle.

¹⁰⁷ E mong hape lipakeng tsa litulo tse hare, phahamisa letsoho la hau, o re, "Moena Branham, ha ke Mokreste. Ke—ke leleketsé Moea o Halalelang hole le 'na hakaale eibile ha O sa ntšoenya hape. Empa, ruri, ke itseba ke fositse. Ke itseba ke e-so tsoaloe bocha ka Moea o Halalelang. Ke itseba ke—ke haelloa. Ha ke na letho . . . Ha ke a ipolela lintho tsohle tsa ka. Ha ke e-so phethise litlhoko tsohle tsa Molimo."

¹⁰⁸ Ekaba u a kula. Ho ke ke ha u thusa letho pele u finyella litlhoko tsa Molimo. "Moena Branham, ke ipoletse Bokreste nako e telele, empa esale ke belaetse pholiso ea Khalalelo. Ke—ke ipotsitse haeba Moea o Halalelang ona o ne o nepile." Oh, khaitseli ea ratehang, kapa, moena ea ratehang, le ka mohla u ke ke oa fumana letho ho Molimo joalo. Che. U tlameha ho phethisa tlhoko ka 'ngoe, u ntoo ikholisa hore u lokile nqa Molimo. Ebe moo u nkang tsepiso ea Oona le ho itšarella ho eona.

¹⁰⁹ Ka letsohong la ka le letšeħali, na ba bang ba ka ba teng mono? Ba bang ba lona bacha morao koana, hakaalo feela, haeba u se Mokreste, phahamisa letsoho la hao le ho re, "Nkhopole, Moena Branham." Molimo a le hlohonolofatse, ke bona matsoho a lona, morao koana, morao ka motšeо, ke a u bona, mofumahatsana; morao mona, yaa. Koana, hole ka mona, e, ngoananyana. Yaa, yaa Morena a le hlohonolofatse ka nqa eo mono. Ke botle.

¹¹⁰ Joale, ke le tsepisitse ka ntle mona e le phetho seo ke tlang ho le kopa sona, ho phahamisa matsoho a lona feela. Joale re tla ea rapela. 'Me pele re etsa sena joale (hoba re phahamise matsoho a baetsalibe, ba ka bang mashome a mabeli kapa a mararo), ba kulang ba bakae, na u ka phahamisa letsoho la hau le ho re, "Nkhopole, Moena Branham, lithapelong tsa hau, Molimo o tle o nkauhele le ho mpholisa"? Ke a kholoa ho na le makholo a mabeli, kapa ho feta, a bona. Ho lokile.

Ha re rapeleng.

¹¹¹ Ntata rona ea Leholimong, ke mohau o mokakang ho tla ho Uena ka likopo tsena. [Sekheo lebanteng—Mohl.] ". . . 'me ho 'Na, Ke 'Mopi oa lona." 'Me ba phahamisa letsoho la bona, hoo ho supa ke hona hobane Moea o moholo oo o feta mahlale ka boholo. Ntate, U itse, "Ha ho motho ea ka tlang ho 'Na, a sa huloe ke Ntate oa Ka pele. 'Me bohole ba tlang ho 'Na, Ke tla ba nea Bophelo ba kamehla." Joale ke ba Hau, Morena. Ba fe Bophelo, hona joale, moo ba lutseng litulong tsa bona. Ba ke ba fumane Bophelo Bosafeleng. U ke u ba tsose ka letsatsi la bofelo, ba hlahisse ho Ntate Molimo oa Leholimo e le mahakoe moqhakeng oa Kereke. Aba sena, Ntate.

¹¹² Ke rapella bana ba kulang le ba mahlomoleng. Bongata bo phahamisitse matsoho a bona bosius bona, hobane ba bone mosali ea neng a hlile a hloka Molimo; o bone lihora tseo tsa pitlahano li atamel. Ha ho pelaelo bongata bo lutseng mona bo a itšoanel, ba tlamehang ho shoa, empa Molimo o se o laetse baporofeta ba Oona, 'me ntho e 'ngoe le e 'ngoe e lokile. E tla sebetsa hantle feela. Haeba ba khotsofetse hore sohle se itoketse, e tla ba ba kholisehile ka Molimo. Ba kholisehile hore O boloka tsepiso ea Oona. Ka hona, Ntate, re U rapela ho sebetsana le bona bosius bona, joaloka bana ba Hau ba ratehang, ba kulang; le ho folisa mahlomola a bona, le ho ba neha matla le mohau le tumelo. Etsa hoo, Ntate.

¹¹³ Hlohonolofatsa bareri bohole ba leng teng mona bosius bona, baporofeta ba lona ba theko e thata. Re U rapela ho ba tlotsa, Morena, 'me ebe bona ba tla hlohonolofatsa malapa a batho bana, hore Bohobe ba Bophelo bo fumanoe malapeng a bona ha feela ba ntse ba phela. Lefiso la bona le se ke la omella le ka mohla, kapa lifaki tsa bona li omelle. Ho ke ho fumanoe bohobe ba moea kerekeng e 'ngoe le e 'ngoe naheng ena, Morena, bo tla fepa ba lapileng ba hlokang. Aba sena, Morena.

¹¹⁴ Re a U rata. 'Me re a tseba hoba U re ratile pele, hobane enere re sa le baetsalibe, Kreste a re shoela, Mohlokamolato bakeng sa ba molato, ho ba pheko ea libe tsa rona, ho re boelanya le Molimo; ha re ne re lahlehile 'me re timetse, re se na Molimo kapa Mora oa Oona, ho tloha tšimong ea Edene, ho tloha littolong tsa bontata rona li re lihetse molubalubeng oa sebe. 'Me Jesu o re ratile hoo A tileng ka thato ea Molimo le ho re lopollela ho Molimo, ka sehlabelo sa bophelo ba Hae Kalvari. Ke a U leboha, Ntate, ka molemo 'ohle oa Hau.

¹¹⁵ Re phela meriting ea mehla ea bofelo. Bosiu ba hosasane bo ka tsoa bo sa fiile le ka mohla. Ha ke tsebe, Morena, hoo ho its'etlehile ho Uena. Empa e re khonahalo e sa le teng ea hore ba bang ba kene bosius bona, Ntate, ke U rapela ho romela Moaea o Halalelang.

¹¹⁶ U itse, "Joaloka matsatsing a Sodoma, ho tla ba joalo le ho tleng ha Mora motho." Mehlgeng ea Sodoma, mehlahloe ea batho e ne e le meraro: moetsalibe, setho se fofo sa kereke, le Mokhethoa (ba bitsitsoeng); Basodoma, le Malota, le ba ha Abrahama (ba bitsitsoeng lefatšeng). Basodoma ba amohetse bareri ba babeli ka molaetsa o moholo. 'Me sehlopha sa Abrahama sa fuoa pontšo, 'me pontšo e ne e le Monna ea lerole liaparong tsa Hae, ea tsebileng Abrahama, athe ke molata; o tsebile mosali oa hae, Sara, lebitso la hae; 'me, le ho bolella Abrahama, a furaletse tente eo Sara a neng a le ho eona ka mokokotlo oa Hae, "Ebe o tšehele ka lebaka lefe?" Oho Molimo, kereke e ke e phaphame 'me e bone! Joalokaha Jesu a boletse, "Joaloka matsatsing a Sodoma, ho tla ba joalo le ho tleng ha Mora motho." Molimo oo o ne o tla bonahala nameng ea Kereke ea Oona, le ho hlahisa pontšo eona

eo. Aba sena, Morena, hape bosiung bona. Re kopa Lebitsong la Jesu. Amen.

Ke a Mo rata, ke a Mo rata
Joale Mo khumameleng ka mosa ka Moea.

Hoba A nthatile pele
Le ho lefella poloko ea ka
Fateng sa Kalvari.

¹¹⁷ Oh, ka morao ho molaetsa, na ha u ikutloe u hohlioe kahohle? Feela Moea o Halalelang feela ho hloekisa pelo ea hau ho se lumeleng hohle, ho u busetsa hantle tseleng le Molimo hape. Oh, joale ke nako ea ho Mo khumamela. Molaetsa o fetile, ka hona ha re Mo khumameleng hang hape ka sefela sena, ha re ntse re bina *Ke A Mo Rata*. E mong le e mong, ka khutso feela le ka monate joale. Koala mahlo a hau le ho sheba feela ho Oona ka mahlo a hau a moea, ho bona seo A se etselitseng mohlolohali eo. Le uena u rateha ho Eena hakaalo ka mohlolohali eo, O babaletse bophelo ba hau, le uena. Na ha u Mo rate?

Ke a Mo rata, ke a Mo rata
Hoba A nthatile pele
Le ho lefella poloko ea ka
Fateng sa Kalvari.

Ngaka e khōlō e haufi joale,
Jesu ea nang le kutloelo-bohloko;
O thabisa pelō e saretsoeng,
Ha ho lebitso le leng haese Jesu.

Lebitso le ratehang,
Lebitso le monate ha le binoa ke batho,
Pina e monate ka ho fetisia e kileng ea binoa,
Oho, Jesu, Jesu ea ratehang.

¹¹⁸ E re a sa letsa lekolilo la sona ka thomo, hasesane. [Moena Branham o binela *Ngaka E Kholo* ka marameng—Mohl.] Ha ke utloa sefela seo, se nkhatlisetsa ntho e le 'ngoe. Nakoana e fetileng mane Ft. Wayne, Indiana, teng ngoanana oa Dunkard o ne a lutse, a ntse a letsa piano. E ne e se Mopentekosta, feela a le moriri o molelele o le motle ka sekotlong. 'Me ke tla rapella bakuli, 'me oa pele moleng e le moshanyana, a holofetse, a tšoeroe ke polio. 'Me ka nka moshanyana matsohong a khaitseli, 'me ka tšoara moshanyana, 'me ka re, "Ruri, Ngaka e kholo e teng mona, e tseba liphiri tshole tsa lipelo."

'Me ka re, "Na le lumela seo?" ho bamameli ba likete tse 'maloa.

¹¹⁹ "E," bohole ba ne ba e lumela. Empa ba ne ba batla ba chehile phiri, e ne e le bosiua ba pele ba kopano, 'me ba ne ba . . . Molaetsa o ne o ba imela ho o utloisia.

¹²⁰ 'Me ka re, "Na le lumela Morena Jesu a ka mpolella moshanyana enoa ke mang, le lebitso la hae? Na le tla lumela?

E tla be e le lona Lengeloi leo le kopaneng le Abrahama, le tsebileng seo Sara...Na e tla be e le eena Jesu ea tsebileng Nathanaele mohla a tlileng, ea tsebileng Petrose 'me a 'mitsa ka lebitso, ho borella mosali selibeng, le lintho tsena tsohle? Na e tla be e le eena Jesu eo?" Bohle ba ne ba phahamisitse matsoho a bona, ba hopotse ho tla be ho le joalo.

¹²¹ 'Me Moea o Halalelang oa qala oa senola sena. 'Me, hoba A etse, moshanyana a qhoma liphakeng tsa ka, a matha a theoha 'me a qhoma a tsoa kalaneng. 'Mè a akheha a lutse setulong hantle ka pel'a moshanyana. 'Me moshanyana a ntse a mathela holimo le tlase. Ngoanana oa mo-Amish, kapa mo-Dunkard e ne e le eena, o ne a letsa piano, a hla a soeufala, a tlolela holimo ka—ka hantle khabareng ea kopano, 'me moriri oa hae oa oela mokokotlo oa hae. O ne a apere mose o mosoue. Eka lengeloi. 'Me a qala a se bina ka lipuo tse sa tsejoeng. 'Me, hoba a etse, piano ha e a ka ea fosa leha e le noto, e ntse e bapala:

Ngaka e khōlō e haufi joale,
Jesu ea kutloelo-bohloko;
O khotthata lipelo tse nyahameng ho thaba,
Ha ho lebitso le leng haese Jesu.

¹²² Batho ba bokana ba teetse aletare, ba lla, ba oela lipakeng tsa titulo, le ho hoeletsa "Molimo nkauhele!" Oh, e ne e le kopano e kakang!

¹²³ Ngaka e kholo eo e sa le teng mong. Ha A eso hlolehe le ka mohla. A ke ke a hloleha le ka mohla. Joale, ba bakae ka mona ba lumelang seo, ka botšepehi, ka pelo tsohle tsa lona, 'me u mona bosiusg bona ka litebello tsa ho folisoa ke matla a Molimo?

¹²⁴ Motho eo ke mo tsebang ha a le teng ka mohahong, kantle ho bana hantle mona, bashanyana bana ba lutseng mona, ba bararo bao ke qoqileng le bona letsatsi le leng puisanong, ho tsoa Arkansas; Moena Pat Tyler, e leng senokoane se sokolohileng; Moena Williams ea lutseng hantle mono; 'me ho latela kamoo nka... le Moena Gene Goad, mokhotsi oa ka, ea lutseng hantle mona. 'Me ke kholoa e le phetho seo ke se bonang ka mohahong seo ke se tsebang nakong ea joale, empa ka mokhoa ona ke tseba batho bana ba lutseng mona.

¹²⁵ Joale, nkile ka ema ke ts'oere Korane letsohong le le leng, le Bibele ka ho le leng, ka pel'a likete tse lekholo, le ho re "e 'ngoe e tlameha ho loka, 'me e 'ngoe e fose." 'Me bolumeli ba Bokreste ke bona feela hara litumelo tsohle; 'me Evangelie Tletseng ke eona feela hara tsona bo ka kholisang hobane Jesu Kreste o sa ntse a phela. Tse ling tsohle li ts'oere thutabomolimo, 'me ba tla le borella ka eona, "Re ts'oere saekholozi e lekaneng hakaalo feela." Ba-Mohammedane ba re, "Re ts'oere saekholozi e lekaneng hakaalo feela. Re ka hloliea hakaalo ka moporfeta oa rona ka ha le ka etsa ka Jesu oa lona. Empa moporfeta oa rona ha a ka a re tsepisa letho. Jesu oa lona o le tsepisitse hore

O tla tsoha bafung, 'me lintho tseo A li entseng le tla li etsa le lona hobane O ne a tla phela ka ho lona. Joale u re moporofeta oa rona o shoele, kantle mono ka lebitleng, 'me le na le Jesu ea tsohileng bafung. Ha re 'Moneng ha A nka khato.' Ba tla beha . . . ho se ke . . .

¹²⁶ U ka ipapalla mona le baithuti bana ba thuto ea bolumeli, ka mantsoe a itseng a Segerike kapa ntho eo le uena u ferekaneng ka eona ka botlalo, empa le ka mohla u se leke ho kenela makhaolakhang le ba bang ba batho bao. Molemo keha u ts'oere seo u buang ka sona. 'Me e mpe ebe u a tseba. Ke ka hona ho leng thata ho romela baromua mono. Ba tseba seo ba buang ka sona. 'Me u mpe u tsebe, hobane ba tla u qholotsa ka eona.

¹²⁷ Empa ke leboha haholo bosius bona, ho tseba, metsoalle, hore Jesu oa rona (le tsepiso e 'ngoe le e 'ngoe eo A e entseng) ke 'Nete. Hola nka folisa mang mona, nka etsa hoo; haeba ke sa e etse hoo, ke tla be ke le moikaketsi. Empa nke ke ka khona. Empa Molimo o file kereke mpho, eo A e tsepisitseng.

¹²⁸ Hore matsatsing a Luthere, re ne re phela ka tokafatso. Matsatsing a Wesley, re ne re phela ka khalaletso, kereke ea fetoha paloana. Matsatsing a Pentekosta, re phetse re haola Kolobetsong ea Moea o Halalelang le khutlisetsa ea lineo. Joale re hlile re banyenyane ka palo, ho tla ha Mora Molimo. *Mona* ba lumetse ka tumelo; *mona* ba hoelelitse tlasa khalaletso; *mona* ba buile ka lipuo joaloka neo; empa *joale* posetifi le neketifi, 'me e—'me hloro e se theohela holima piramite, 'me ke nako ea bofelo, mohla Kreste le Kereke ea Hae ba tsoanang hakaale hofihlela tla bitsa bafu ho tsoa ho Methodise, Luthere, le bao bohle morao mono, 'me ho tla ba le tsoho. Ba robetseng tebelong ea pele, ea bobeli, ea boraro, ea bone, ea bohlano, ea botselela, le ea bosupa, ba tla hlaha ka le leng la matsatsi ana, ho kopana le Jesu libakeng. Hora e fihlile, metsoalle, ho Tla ha Morena ho atametse.

¹²⁹ Re sheba Jerusalema 'me re bona Bajuda ba ne ba foufatsoe ka lebaka la rona. Sefate sa feiga se hlahaha menoko ea sona. O itse, "Le lifate tse ling." Billy Graham o hlassisitse e—e tsoselsetso har'a batho ba maipolelo a molomo. Oral Roberts o tsositse tsoselsetso har'a Mapentekosta. 'Me joale Jesu, Mora Molimo, o kene ho masalla ana, ho hula batho bakeng sa Lejoe la Hloro, ho khutlisa Mora oa Molimo, ho phethela taba eo bakeng sa ho Khutla ha Morena Jesu. O itse, "Joaloka matsatsing a Sodoma, ho tla ba joalo ho Tleng ha Mora motho."

¹³⁰ Ke tla le furalla, e sang feela hore le tle le bone. Joale, hopola, e ne e se monna eo. Monna ea lutseng mono e ne e le feela k'halsiamo, potashe, le petroleamo, lielemente tse leshome le metso e tšeletseng tsa lefatše Molimo oa re, "Pheu!" ho bulula 'moho le ho kena ho 'ona 'me o ne o phela.

¹³¹ Jesu Kreste e ne e le ntho e tšoanang. E ne e le Mora oa Molimo. E ne e le Molimo a bonahalitsoeng nameng, empa nama ea hae e ne e le motho, Moea oa Hae e ne e le Molimo. Eaba O tsepisa matsatsing a ho qetela hore O tla kena kahar'a Kereke ea Hae. "Ho se ho se hokae 'me lefatše ha le sa tla Mpona; haele lona le tla Mpona, hoba Ke tla ba le lona, le ka ho lona. Mesebetsi eo Ke e etsang le tla e etsa le lona." Le a bona? Joale Ngaka eo e kholo e teng mona.

¹³² O itse, joale, "Pontšo ea Sodoma le Gomora." Joale, ke eng? Shebang lipampiri tsa rona, "Dihomosekuuale, khopamiso, e ja setsi ka lipheresente tse mashome a mane lilemong tse leshome tse fetileng." Litšisinyeho tsa lefatše libakeng tse ngata, mefuta eohle ea lipontšo tsa ho Tla. Kereke e a koeneha, nako ea ho qetela e mona.

¹³³ Joale Molimo o bontša lipontšo tsa Oona, hape, joalokaha esale re rera ka tsona. Joale, haeba Bibebe ena e le 'nete, etsoe e Le joalo, ke ikemiselitse ho shoela morero oo. Bibebe e nepahetse. Jesu Kreste o a phela. Re Kereke ea Oona, ho tlatsoa ka Moea oa Oona, ke moo Bophelo ba Hae ka ho rona bo tla hlahisa bona Bophelo boo A bo phetseng ka har'a Mora Molimo, haeba Moea o Halalelang—Moea o Halalelang oa Molimo o phela ka ho rona.

¹³⁴ Bakeng sa khanya ea Molimo le bakeng sa kereke, le bakeng sa maloetse a lona, lona ba kulang le ba mahlomoleng, amang qola ea seaparo sa Hae, le ho bona haeba le ke ke la etsa hore A bue ka 'na, joaloka mohlanka oa Oona, ho le bitsa joaloka ha A kile a etsetsa mosali ea amileng seaparo sa Hae. Morena a ke a e abe. Na e ka etsa hore le lumele haholo, le ho amohela pholiso ea lona? Ba bakae ba lumelang hore ba ka amohela pholiso ea bona ha Molimo O ka u bitsa joalo, kapa ho O bona o bitsa? Phahamisa letsoho la hau. Morena a ke a e abe.

Se phetse ho letska *Ngaka E Kholo* eo, u tla etsa joalo? Ke ikutloa ke tataisoa ho etsa joalo.

¹³⁵ Ke tla retolohela ho metsoalle ea ka mona bosiusng bona hape, ho le talima feela. Baena, ha ke leke... ho uena... Molimo ke paki ea ka, Moena David. Ruri joalokaha ke e hlakiselitse batho ka ho lekana, hore, ha se 'na. Ha ke amane le eona ka letho. Ke mpa feela... Molimo o ne a loketse ho sebelisa motho e mong. O a... 'Me ha ho matsoho a tšoanelehang, empa ke Molimo o etsang hore a tšoanelehe. Le a bona, O—O—O khetha pele ho motheo oa lefatše, Morero oa Oona o tlameha ho phethisoa, 'me o tlameha ho etsoa, o tlameha ho phethoia.

¹³⁶ Kereke e tla ba teng, e se na letheba kapa letsika. Ke mohau oa Molimo o tla etsa hoo. E tlamehile, e tla qosa mohau. Joaloka ha A buile le Abrahama, mohla Sara a Mo belaelang. Be, hona hoo O ka be o ile oa hlatha; O ka be o bolaile Sara hona moo ka ho belaela, hobane seo ke sona sebe se fetisang ka bobo se leng teng, ke ho se lumele, 'me ke sona feela sebe. 'Me a belaela a tšehe

kahare ho eena mohla Lengeloi le neng le mo senola kahara tente. Na ho joalo? Empa hobaneng A sitiloe ho tlosa Sara? Hobane e ne e le karolo ea Abrahama, O ne a tla tlameha ho tlosa Abrahama, le eena. 'Me rona re karolo ea Jesu ha re le 'Meleng oa Kreste. Ho se lumele ha rona ho tla leballoa haeba re e etsa re sa lemohe joaloka eena, hobane o ne a tšohile.

¹³⁷ Na le a lumela ntho e teng e hlahang kalaneng? Oh, holane nka khona ho e hhalosa. Ke tlameha ho thinya. Ke bona mosali ea letlalo le lekhopho, u Mo amile. E tla u lesa, hoba Leseli le u teetse hare ka mahohle. "Ha u lumela, tsohle li ka etsoa." Joale lumela.

¹³⁸ Hore u tlo bone hore hase saekholoji, ho bala kelello ea hau, ke tla u furalla. Ho thoeng ka lephakong *lee?* Taba ena e kile ea etsoa hang kahara Angeles Temple, khaitseli. Moena David, u a hopola. Joale ke mpa feela... hore u bone, ke bua le uena, hoo ho ntšupa ke sa hokahana le batho ka letho mono. Ruri le—le utlois—... Ke a tseba hore le a utloisia. Le a bona? Empa ke kopa mohau oa Molimo ho etsa ntho hore batho ba tle ba tsebe.

¹³⁹ E, ke bona mothoana, mosetsana. O tsoa hole le mona, ha a tsoe naheng ena. O tsoa naheng ea lipula tse ngata le lifate tse ngata le boriba, o tsoa Oregon. O tšoeroe ke sethoathoa. O lutse kantle mono. Ana u a lumela Jesu Kreste o tla u folisa? Na u e amohela sebakeng sa hae? Ema, khaitseli. E-ea hae, 'me ke khalema liabolosi. Na u lumela ka pelo eohle ea hau? Ho lokile.

¹⁴⁰ Moleng oa litulo tse hare mona, motho o teng o na le tumelo. Se belaele. Ke tla bua le uena, Moena Schultz, u tle u bone hore ke bua le uena. Ke lumella motho e mong mono... Ha ho litlankana tsa thapelo ka baka leo e mpa e le—e mpa e le feela ke hona, ha se ho nyolla motho e mong, empa e le hore ba tle ba bone.

¹⁴¹ E, ke mosajana ea batlang a le mosesane, o tšoeroe ke mofetše. O ne a tlameha ho ea kokelong kajeno. O lutse ka pele mona, e batla e le mosajana e mosesane. Lebitso la hae ke Mfn Peterson. Le a bona? Ho lokile, mofumatsana, eba le tumelo ho Molimo. Molimo oa Leholido a bolaee liabolose eo a se hhole a bonoe ke motho. Na u lumela ho Mora oa Molimo? Na u Mo lumela ka pelo ea hau eohle? Eba le tumelo ho Eena feela, ke phetho seo u lokelang ho se etsa. Ho lokile.

¹⁴² Na bohle le itokiselitse ho lumela ka nqa *ena?* Ereng ke qoqe le moreri enoa mona. Na u lumela ka pelo eohle ea hau? Ke tšepa motho e mong ka mona a etsa joalo, hape. Uh-hum. Le tle le tsebe hobane ke bua le lona. Empa ho bona matla a Molimo a sira lintho tsohle tsa kelello, ho kena selikeng sa seperete... selika sa seperete.

¹⁴³ E, ka mora ka ke e—e mosali, 'me ha a tsebe bothata ba hae. Ke e... Oh, mosali eo oa batho! O entsoe lioporeishene tse 'ngoe, peli, tharo, 'ne, hlano. Ha ba tsebe seo e leng sona. Lingaka ha li tsebe ke eng. O tlisitsoe mona Arizona ho phomola.

O tsoa Louisiana, lebitso la hae ke Mof. Pearson. Ke hantle, Mof. Pearson, kae-kae ka mora ka, ema, u ntalime. U a lumela ke moporofeta oa Molimo? Ha ke u tsebe. Haeba ho lokile, tsokotsa letsoho la hau. Re—re basele e mong ho e mong. Se builoeng ke nnete. Na ho joalo? Lingaka ha li tsebe bothata ba hau. Ke methapo ea hau. Ho kutsa haholo tu, eba le tumelo, 'me u tla khutlela hae u folile. Eba le tumelo ho Molimo! Na u a lumela Mora Molimo o tsohile bafung hape?

¹⁴⁴ Joale, ho ka thoeng ka motho ka lephakong *lena*? Na bohole le itokiselitse ho lumela morao mona? Pat, na u thabetse hore ebe u Mokreste? Na ha se bokhabane ho tsoa bophelong boo u kileng oa bo phela, le ho ba Mokreste?

¹⁴⁵ Mofumatsana ke enoa. Ke mosali, monna, le ngoana. Mofumahatsana o ntse a holehana le Molimo. O ka morao ho 'na. 'Me o tšoeroe ke bothata ba mala a mofuta, 'me eena—eena o na le bofokoli kamorao ho moo. Ha a tsoe mona, le hona, o tsoa naheng kang lehoatata, empa o tsoa Kansas. Monna oa hae ke moreri. Ke eena ea lutseng hona moo. Ha ke u tsebe. Haeba ho le joalo, mofumahali, tsokotsa matsoho a hau *tjena*. Ho lokile, monghali. Ho lokile, e-ea lapeng, lumela ho Morena Jesu Kreste u fole. Na u lumela ho Morena?

¹⁴⁶ Hohle holim'a moaho joale, na le lumela ho Morena? Ehlide, O teng mona! Jesu Kreste, eena maobane, kajeno, le kamehla. Oona Molimo o khonneng ho bontša Elia moo mosali eo oa mohlolohali a neng a le teng. Oona Molimo oo ka mpontša moo u leng teng, u lutse, u rapela, hoba ke Moea oa Jesu Kreste, eena maobane, kajeno, le kamehla. Le a e lumela? Bohle ka mona le beane matsoho ke sa le rapella ka kakaretso, hantle mona, 'me le lumele, le tle le tsebe hobane le lona le na le seabo ho eona, e mong le e mong oa lona. Le balumeli, ha ho joalo? Haeba ho le joalo, e reng "Amen." [Phutheho e re, "Amen." —Mohl.] Ka pel'a Sefahleho sa Molimo, ka bopaki bo sa fanyeng ba tsoho ea Jesu Kreste, beanang matsoho holimo 'me le rapellane.

¹⁴⁷ Ntata rona ea Leholimong, ke U nea letšoele lena le letileng. Batho bana bohole ba bakileng libeng tsa bona ba fumane kereke e ntle ea lehae. Ba ke ba khone, Morena, ba kulang ba fole. Matla a Satane a robjoe, holim'a maphelo a bona hona joale, ha ke khalema liabolosi 'me ke kopa Matla a Jesu Kreste ho theohela holima letšoele lena le ho tlosa lefu le leng le le leng, lefu le leng le le leng, mahlomola a mang le a mang, pelaelo ka 'ngoe. E leleke ho bona, Morena, 'me ba folise. Ka Lebitso la Jesu Kreste, Mora Molimo, ke a e kopa.



ELIA LE NYEHELO EA PHOOFO SST60-0310
(Elijah And The Meal-Offering)

Molaetsa wona, ka Moena William Marrion Branham, o rerilwe sethatong ka Senyesemane Labone mantsiboya, Hlakubele 10, 1960, mane Madison Square Garden, Phoenix, Arizona, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org